

**Nunatsinni tarnip pissusaanik ilisimatusarnerup iluani ilinniarfimmik imaluunniit
pikkorissaanernik pilersitsisoqarnissaannik pisariaqartitsineq kiisalu taakku
aningaasaqarnikkut allaffissornikullu kingunerisassaas pillugit Naalakkersuisut
nassuiaasioqqullugit peqquneqarnissaannik Inatsisartut aalajangiiffigisassaattut
siunnersuut.**

*Inatsisartunut ilaasortat Mariane Pavisen Jensen aamma Paarma Lund Kreutzmann, Inuit
Ataqatigiit saqqummiussaas*

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Nivi Heilmann Efraimsen, Inuit Ataqatigiit, siulittaasoq
Inatsisartunut ilaasortaq Isak Johannessen, Naleraq, siulittaasup tullia
Inatsisartunut ilaasortaq Margrethe Thårup Andersen, Demokratiit
Inatsisartunut ilaasortaq Hans Erik Enoksen, Demokratiit
Inatsisartunut ilaasortaq Anders Olsen, Siumut

UKA 2025 ulloq 8. oktober siullermeerinninnerup kingorna ataatsimiititaliap siunnersuut
misissorpaa.

Siunnersuutip imarisaa siunertaalu

Naalakkersuinikkut pingaarnersiuinermi “Peqqissutsimut tunngatillugu isumaqatigiissut
2023”-mi tarnikkut nappaateqarneq pillugu naalakkersuinikkut iliuusissanik
siunniussaartoqarpoq. Sammisat tallimaattut iliuuserineqartussat ukiut 1-3-it akornanni
tassaavoq Kalaallit Nunaanni tarnikkut katsorsaasarneq ataatsimut isigalugu
pilersaarusiornissaq. Peqqinnissaq pillugu Ataatsimiitsitaliarsuup isumaliutissiissutaani

tarnimikkut nappaatilittut nalunaarsorneqarsimasut 1400—it missaaniipput. Tassa innuttaasut 2,4 %-ii ¹.

Tarnikkut nappaatinik katsorsaasinnaasunik pisariaqartitsinerujussuaq nammassinnaajumallugu siunnersuuteqartut kissaatigaat maani nunatsinni tarnip pissusai pillugit ilinniartissamik neqeroortoqartalissasoq.

Siunnersuutip Inatsisartuni siullermeerneqarnera

Inatsisartut ataatsimiittarfianni siullermeerinninnerup nalaani siunnersuut annertuumik tapersorsorneqarpoq aammalu Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut innersuunneqarluni.

Naalakkersuisut imaattumik allannguutissatut siunnersuuteqarput:

”Suleqatigiissitamik Ilisimatusarfimmit suleqatigisartakkaniillu attuumassuteqartunit peqataaffigineqartumik Naalakkersuisut pilersitsissasut Inatsisartut peqqussuteqarput. Suleqatigiissitaq Ilisimatusarfimmi tarnip pissusaanik ilisimasalittut ilinniarnermik Kalaallit Nunaanni pissutsinik aallaavilimmik pilersitsinermut atugassamik periusissiusaaq ilutigalugulu nunanit tamalaanit ilisimasalinnit ilinniartitaanerup ilusaanik qanoq peqataatitsisoqarsinnaanersoq qulajaassaaq. Periuseq tarnip pissusaanik ilinniarnernup neqeroorutaasinnaaneranik Naalakkersuisut aalajangiisinnaanerinut tunngaviliissaaq”

Siunnersuutip aningaasatigut kingunerisassai

Nalunaarusiorneq A/C fuldmægtigip ukiup ataatsip ingerlanerani sulinissaa 500.000. kr-inik naleqassasoq naatsorsuutigineqartoq siunnersuuteqartup allassimagaa ataatsimiititaliamit maluginiarneqarpoq.

Ataatsimiititaliap siunnersuummut oqaaseqaatissai

Tarnip pissusaannik ilisimasallit suliatigut piginnaasaasa patajaallisarneqarnissaat pillugu kissaat Naalakkersuisut isumaqataaffigigaat ataatsimiititaliamit isumaqataaffigineqarpoq nuannaarutigalugulu nunani allani tarnip pissusaannik ilisimasalittut ilinniartitaanerit assingannik, ilisimatusarfittut qaffasissusilittut neqeroorummik, pilersitsinissamut periarfissat misissuiffigineqassasut. Naalakkersuisut oqaatigisaat ataatsimiititaliamit isumaqataaffigineqartoq tassaavoq ilisimatusarfik tassaassasoq ilinniartitaanermut pissusissamisoortumik aallaaviusussaq, taamaalilluni kalaallit isummersortarnerat aallaavigalugu atuagarsornikkut siammasissumik nunanilu tamalaani akuerineqarnermik

¹ [Sundhedskommissionen præsenterer sine anbefalinger](#)

ilaqartumik inerisarneqarsinnaassammat, matumani kulturi, oqaatsit inuiaqatigiinnilu atukkat ilinniartitaanerup ilaatut ilaatinneqarsinnaassallutik.

Ilisimatusarfimmit suleqatigineqartartunillu attuumassutilinnik peqataaffigineqartumik suleqatigiissitamik Naalakkersuisut pilersitsiniarneri ataatsimiititaliamit naammagisimaarneqarpoq. Suleqatigiissitap ilinniartitaanermik sananeqarnerit ilusilersukkat assigiinngitsut arlallit misissuiffigeqqissaassavai tamannalu aallaavigalugu qanoq pitsaanerpaamik tarnip pissusaannik ilisimasalittut ilinniartitaanermik, nunani tamalaani immikkut ilisimasalinnit peqataaffigineqartumik, Ilisimatusarfimmi pilersitsisoqarnissaanut ilusilersukkamik toqqaassalluni. Ilusilersugaq matuma kingorna Naalakkersuisut ilinniartitaanerup ingerlatsisussarsiornissaa pillugu aalajangiisinnaanissaannut tunngaviliissasoq Naalakkersuisup akissuteqaammini nassuiaatigaa.

Ataatsimiititaliap inassuteqaatai

- Ataatsimiititaliami amerlanerussuteqartut Inuit Ataqatigiit, Demokraatit aamma Siumut ilaasortaatitaasa Naalakkersuisut allannguutissatut siunnersuutaat akuerineqarnissaa inassutigaa.

Taama oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappasaaniigassanngortippaa.

Nivi Heilmann Efraimsen
Siulittaasoq

Isak Johannessen
Siulittaasup tullia

Margrethe Thårup Andersen

Hans Erik Enoksen

Anders Olsen